

宋著長安志

宋聯奎署檢

蘇子卿
藏

PDG

長安縣志局印

重印宋常山公長安志序

嘗謂縣之有志猶國之有史史所傳約而精志所載詳而博漢高入關蕭何先收秦之圖籍以故具知天下阨塞戶口多少強弱及民所疾苦而周官大司徒暨職方氏皆掌天下之圖可諗圖籍之關乎民治自古迄今弗可易已陝右居西北上游關河四塞形勢甲於天下而長安又爲自漢唐以來建都之區宋元而後頻開軍府三輔綰轂九州上腴名雖曰縣實則煌煌大藩非他縣比自來志都邑者三輔黃圖而外僉推宋敏求所箸長安志爲絕作以其蒐采群書罔有遺佚精博宏瞻有裨治方前清乾隆中修四

庫全書收入地理類中稱其瞻博陳振孫書錄解題亦謂
載漢唐舊都遺事甚詳誠人世極可寶貴之書也顧傳刻
頗稀四庫本既不易覲卽畢秋帆尙書所刊本秦中亦絕
少流播

子堅

於民國十九年歲終捧檄蒞此以爲地方之

治有藉於圖書也再三蒐求始得畢公原刻計書二十卷

中列山川道里宮室陵寢坊寺古蹟莫不攷核精確註解
明晰豈僅官於斯土者不可不知闔邑縉紳先生暨膠庠
黎庶苟或有所居稽亦烏可置斯編而不顧哉惟是閱時
已遠歲久事湮丁世多艱原板固已無存卽畢本亦等諸
吉光片羽不復易得深虞淪沒愈歎闕如爰將繕出底本

付諸排印於以存古籍識地形使夫歷載沈晦之編一旦而彰顯於世度亦當代達人賢士深用忻慰而心焉數之者歟若夫近時邑中之風土人情田賦方物名宦鄉賢儒林節烈以及山川考證金石蒐羅子堅正在延聘名賢精切采訪從事編輯另纂新志以續嘉慶年間董氏之書他日稿成再當就正通儒加以筆削緣刊是志聊布區區又常山公此志原附有元代李好文長安志圖三卷蓋亦經秋帆尙書考訂併刻者詳備明晰殊覺可珍再四庫所收宋志本前無趙彥若序此本有之是更較西庫本爲勝矣覽者鑒諸民國二十年四月銅山陳子堅謹序

新校正長安志序

秋帆先生撫陝陝故長安也摻得宋敏求長安志二十卷
校正刻之附以圖三卷問序於予予向求此書未獲今始
一讀焉既卒業作而歎曰美哉先生才之大而思之深超
出乎流俗絕遠也周禮天官司會掌國之官府郊野縣都
之百物凡在書契版圖者之貳司書掌土地之圖以周知
入出百物地官大司徒掌建邦之土地之圖與其人民之
數以天下土地之圖周知九州地域廣輪之數辨其山林
川澤邱陵墳衍原隰之名物土訓掌道地圖以詔地事誦
訓掌道方志以詔觀事夏官職方氏掌天下之圖以掌天

下之地然則欲知輿地必藉圖志周公已言之章章明矣
蕭何入秦先收圖書所以具知天下阨塞戶口多少彊弱
民所疾苦蓋儒者不出戶庭而能周知方域此讀書之所
以可貴也以此蒞政則能先時豫籌因地制宜恢恢乎游
刃有餘焉可見圖志之裨益於政事似緩而實急夫豈俗
吏所知哉唐以前地志存者寥寥宋元人作存者不下二
十餘然皆南方之書北方惟有此志與于欽齊乘耳而長
安漢唐都邑所在事蹟尤夥紀載尤宜加詳宋氏此編綱
條明折贍而不穢可云具體厥後程大昌雍錄好發新論
穿鑿支離不及宋氏遠矣先生旣刻此又於其間糾正踳

駁疏釋蒙滯附於逐條之下焉夫以軍民政務之填委文
檄簿牘之旁午他人竭蹶應之日不暇給先生乃能以餘
力表揚墜典斯其才之大誠有過人者若其靜察乎攷古
之足以證今披圖案牒以興革利弊其補助化理最切則
尤先生用意之深也先生本名儒爲文學侍從臣出掌封
圻治績茂異固宜卓識之度越流俗絕遠與圖每卷署河
濱漁者實出元李好文撰古人地志必與圖俱司會司書
等職所謂版圖地圖者此物此志也先生彙訂以傳亦猶
士訓誦訓之道地圖道方志云爾

乾隆五十有二年歲次丁未季秋之月嘉定王鳴盛西莊

氏再拜謹譔時年六十有六

長安志序

太常博士充集賢校理崇文院檢討同知丞事趙彥若
撰

雍之爲都涉三代歷漢唐之全盛世統屢更累起相襲神
靈所儲事變叢巨宜其較然有明冊大典暴天下耳目而
圖牒殘脫宿老無傳求諸故志唯韋氏所記爲一時見書
遺文古事悉散入他說班班梗槩不可復完非好學深思
博物善作孰能盡收其軼而追成之長安志者今史官諫
議大夫龍圖閣直學士常山公所定著也公以文章世家
爲朝廷名臣兢業之餘紀述自命蓋考論都邑網羅舊聞

詞人所銳精而載筆之尤務也近代建國率繇西遷崑函之區陶冶浚洛實上游要會最重之地而侈毀零落寢就堙沒將無以自振校之本末先後二京已錄固不得獨闕於此前在河南旁接三輔嘗有意於搜采矣然猶未遑暇又踰二紀乃創屬體緒續次其言窮傳記諸子鈔類之語絕編斷簡靡不總萃隱括而究極之上下浹通爲二十卷用備舊都古今之制俾其風灑光塵有以奮於永久故夫府縣有政官尹有職河渠關塞有利病皆干於治而施於用取諸地記集而讀之而後見其法敘列往躅遠者謹嚴而簡近者周密而詳各有所因革規模猶親處其世畫里

陌同經行之熟而後見其功自本而推始終大略其所昭發又不特如是而已竊嘗望丹鳳門故趾勢侔碣石疑非人力所爲自想當時眞偉觀也及驗未央建章殿當宮闕之俊則其繁夥宏廓氣象飛動過大明遠甚以漢室之隆兼制夷夏非壯麗無以重威亦可信也復上觀於周惟有鎬京靈臺辟雍明堂豐宮詩所謂經始勿亟庶民子來又稱自西自東自南自北無思不服昔之與衆同樂遂物之性所以致之之効乃能至於此乎察其故專尙簡易儉約曾不言形勝強富益知仁義之尊道德之貴彼阻固雄豪皆生於不足漢唐之迹更爲可羞烏乎盛夫若然得以貢

於明朝監千載餘敝修豐鎬故事以澤吾人豈曰小補哉

熙寧九年二月五日謹序

長安志卷第一

史龍圖閣直學士 禮部右諫議大夫 修國侯宋敏求撰

等兵部侍郎兼都察院右副都御史巡撫陝西西安 畢沅新校正

總敘

分野

土產

土貢

風俗

四至

管縣

戶口

雜制

總敘

京兆府

治萬年長安二縣

尚書禹貢雍州之域舜置十二牧雍其

一也又古豐鎬之地周文武之所都毛詩曰作邑於豐又

曰宅是鎬京

豐邑在豐水之西鎬京在豐水之東武王作邑在鎬京

漢書曰文王作

豐

師古曰今長安西北界靈臺鄉豐水上是

武王治鎬

師古曰今昆明池北鎬陂是

世本曰

武王在豐鄙

杜預左氏傳注曰豐在始平縣東說文曰鎬在上林苑中鄙與鎬同

雍州爲

王畿平王東遷以岐豐之地賜秦襄公

史記蘇秦說秦孝公曰秦四塞之國

被山帶河外有洪河之險西有漢中巴蜀北有代馬之利此天府也又曰獻公徙居櫟陽孝公用商鞅作咸陽築冀

關徙都之

至孝公始都咸陽秦并天下置內史以領關中

內史周官

關中記曰秦西以隴關爲限東以函谷爲界二關之間是謂關中之地東西方千餘里南北近山者相去一二百里遠者三四百里南山自華嶽西連秦嶺終南太白至于隴山北有高陵平原南北數千里東西二三百里西接岐梁汧雍之山關中有涇渭霸澠豐瀉潏潏之水林賦云八川分流者也顏師古曰霸澠涇渭豐瀉潏潏是謂八川

項籍滅秦分其地爲二封章邯爲雍王都廢丘今興平縣司

馬欣爲塞王都櫟陽

韋昭曰在長安東名桃林塞師古曰取河華之固爲阨塞耳非桃林也塞

音先代反沅案太平寰宇記有云今櫟陽縣詳前後文例本文亦當有之恐脫

董翳爲翟王都高

奴今延州金明縣謂之三秦漢高祖元年更雍州爲渭南

郡五年高祖在洛陽從婁敬說始都之

漢書曰秦地於禹貢時跨雍梁二州

漢興立都長安

九年罷渭南郡復爲內史景帝分置左右內史此

爲右內史

沅案分左右內史地理志以爲武帝建元六年百官公卿表以爲景帝二年從表爲是

三

輔黃圖曰武帝太初元年改內史爲京兆尹以渭城以西

屬右扶風長安以東屬京兆尹長陵以北屬左馮翊以輔

京師謂之三輔又置三輔中輔理華陰左輔理高陵右輔

理鄠兼三都尉亦曰六輔

胡廣漢官解詁曰三輔典境理人與守職同而俱在長安城中

又置司隸校尉三輔咸屬

東方朔曰三輔之地南有江淮北有河渭

隴以東商雒以西厥壤肥饒此所謂天府陸海之地也

沅按

此用朔本傳文而畧改字本書此例最多

王莽分長安城旁六鄉置帥各一人

分三輔爲六尉郡

師古曰三輔黃圖云渭城安陵以西北至榆邑義渠十縣屬京尉大夫府居故

長安寺高陵以北十縣屬師尉大夫府居故廷尉府新豐以東至湖十縣屬翊尉大夫府居城東霸陵杜陵東至藍田西至武功郁夷十縣屬光尉大夫府居城南茂陵槐里以西至汧十縣屬扶尉大夫府居城西長陵池陽以北至雲陽襍羽十縣屬列尉大夫府居城北

更始元年三輔各復其舊光武都洛

陽以關中地復置雍州領縣十尋罷復置司隸校尉統

三輔如舊獻帝時董卓謂陳紀曰三輔平敞四面險固土

地肥美號曰陸海遂徙都長安魏文帝分河西爲涼州隴

右爲秦州改京兆尹爲太守馮翊扶風各除左右仍以三

輔屬司隸晉省司隸於長安置雍州統京兆馮翊扶風安